

## Održan master-class ruskog jezika na Filozofskom fakultetu u Sarajevu

Na Filozofskom fakultetu Univerziteta u Sarajevu, u utorak, 21.5. 2019. upriličen je cjelodnevni program za studente i nastavnike Odsjeka za slavenske jezike i književnosti u organizaciji Ruske humanitarne misije za Balkan (RHM).



Nakon što je goste svečano dočekala prodekanesa za međunarodnu akademsku suradnju doc. dr. Selma Đuliman, prisutne studente i nastavnike pozdravili su direktor RHM za Balkan Mihail Bondar i rukovoditeljica Odsjeka za slavenske jezike i književnosti doc. dr. Amela Ljevo-Ovčina.

Program je počeo predavanjem profesora Viktora Mihajloviča Šakleina, rukovoditelja Odsjeka za ruski jezik i metodiku njegovog predavanja na Filološkom fakultetu RUDN, koji je govorio o teorijskim i praktičnim aspektima predavanja ruskog jezika u vanjezičnoj sredini.



Nakon predavanja profesora Šakleina, uslijedio je master-class, koji je održala profesorica Anna Jur'jevna Petanova. Predstavivši i opisavši nove tendencije u predavanju ruskog jezika kao stranog, profesorica je uputila prisutne na korištenje naprednih tehnologija za lakše učenje i usvajanje ruskog jezika.





Treći dio programa bio je otvoreni sat pod vodstvom profesorice Nadežde Vasiljevne Kondrat. Na ovom interaktivnom satu studenti Odsjeka za slavenske jezike i književnosti pokazali su znanje, spremnost za komunikaciju na ruskom jeziku te otvorenost za nove načine učenja.





Po završetku programa, svi sudionici su dobili certifikate i priručnike za učenje ruskog jezika.



Zahvaljujemo se svima koji su sudjelovali i time doprinijeli da se produktivna suradnja RHM za Balkan i Odsjeka za slavenske jezike i književnosti nastavi razvijati.

Iz Odsjeka